

ხ ე ლ შ ე კ რ უ ლ ე ბ ა

„სოციალურად დაუცველი ოჯახების მონაცემთა ერთიან ბაზაში“ რეგისტრირებულ ფიზიკურ პირებზე არსებული ზოგიერთი ინფორმაციის შპს „ნებულასთვის“ მიწოდების შესახებ

ქ. თბილისი

25. 05. 2016 წ.

საქართველოს შრომის, ჯანმრთელობისა და სოციალური დაცვის სამინისტრო (შემდგომში - „სამინისტრო“), წარმოდგენილი მინისტრის მოადგილის, ზაზა სოფროშაძის სახით, სამინისტროს სახელმწიფო კონტროლს დაქვემდებარებული სსიპ - სოციალური მომსახურების სააგენტო (შემდგომში - „სააგენტო“), წარმოდგენილი დირექტორის მოადგილის მოვალეობის შემსრულებლის, კობა სონღულაშვილის სახით და შპს „ნებულა“ (შემდგომში - „ნებულა“), წარმოდგენილი გენერალური დირექტორის, გიორგი ჭილაიას სახით (შემდგომში - „მხარეები“),

საქართველოს მოქმედი კანონმდებლობით, მათ შორის, „პერსონალურ მონაცემთა დაცვის შესახებ“ საქართველოს კანონის მე-5 მუხლის „ა“ და „თ“ ქვეპუნქტების, „სოციალური დახმარების შესახებ“ საქართველოს კანონის მე-17 მუხლის „გ“ და „ზ“ ქვეპუნქტების, საქართველოს მთავრობის 2010 წლის 24 აპრილის N126 დადგენილებით დამტკიცებული „სოციალურად დაუცველი ოჯახების მონაცემთა ერთიანი ბაზის ფორმირების წესის“ მე-8 მუხლის მე-3 პუნქტის საფუძველზე, საქართველოს შრომის, ჯანმრთელობისა და სოციალური დაცვის მინისტრის 2007 წლის 27 ივნისის №190/ნ ბრძანებით დამტკიცებული „სააგენტოს“ დებულების მე-2 მუხლით განსაზღვრული უფლებამოსილების და „ნებულას“ წესდების ფარგლებში, „ნებულას“ პარტნიორთა 2016 წლის 11 აპრილის კრების ოქმის გათვალისწინებით, ვთანხმდებით შემდეგზე:

მუხლი 1. ხელშეკრულების მიზანი და საგანი

1. „ნებულას“ მიერ „სააგენტოსგან“ ინფორმაციის გამოთხოვა ხდება თავისი საქმიანობიდან გამომდინარე, მონაცემთა სუბიექტისათვის მის მიერ განხორციელებულ საგანმანათლებლო პროექტში მონაწილეობის დაფინანსების შეღავათის გავრცელების მიზნით.

2. წინამდებარე ხელშეკრულების საგანია „სააგენტოს“ მიერ „ნებულასთვის“ „სოციალურად დაუცველი ოჯახების მონაცემთა ერთიან ბაზაში“ (შემდგომში - „ბაზა“) რეგისტრირებული იმ ოჯახის წევრის შესახებ ინფორმაციის მიწოდება, რომლის სოციალურ-ეკონომიკური მდგომარეობის მაჩვენებელი პირობითი ერთეული (სარეიტინგო ქულა) - არ აღემატება 100 000-ს და რომელსაც „ნებულასათვის“ შესაბამის საიტზე - <http://www.nebula.ge> (შემდგომში - „საიტი“) გამოხატული აქვს თანხმობა მისი ოჯახის სოციალურ-ეკონომიკური მდგომარეობის შესახებ ინფორმაციის გამოთხოვაზე.

3. „ნებულასათვის“, ამ მუხლის მე-2 პუნქტის შესაბამისად, მონაცემების მიწოდება ხორციელდება ამ ხელშეკრულების N1 დანართით გათვალისწინებული პირობების შესაბამისად.

მუხლი 2. კავშირის უზრუნველყოფა

1. „ნებულასათვის“ ინფორმაციის მიწოდება ხორციელდება „სამინისტროს“ ინფორმაციული ტექნოლოგიების ინფრასტრუქტურის/ელექტრონული სისტემის (შემდგომში - ინფრასტრუქტურა) მეშვეობით, რომლებიც უზრუნველყოფს მის გამართულ მუშაობასა და შეუფერხებლად გამოყენებას.

2. ინფორმაციის მისაწოდებლად მხარეთა შორის კავშირი მყარდება დახურული კერძო ქსელის (VPN) საშუალებით, რომელიც აიგება ინტერნეტ სერვისის პროვაიდერის საკომუნიკაციო არხების გამოყენებით. დახურული კერძო ქსელის აგებისას გამოყენებული ქსელური მოწყობილობა უნდა აკმაყოფილებდეს შემდეგ მინიმალურ მოთხოვნებს:

- ა) მარშრუტიზაციისა და IPSec Tunnel ტექნოლოგიის მხარდაჭერა;
- ბ) შიფრაციის პროტოკოლის 3DES მხარდაჭერა;
- გ) ჰეშირების პროტოკოლის SHA მხარდაჭერა;

3. წინამდებარე ხელშეკრულების ამოქმედებიდან 10 (ათი) სამუშაო დღის ვადაში „სამინისტროს“ უზრუნველყოს დახურული კერძო ქსელის (VPN) კონფიგურირებას (გამართვას).

მუხლი 3. მხარეთა კომუნიკაციის პირობები

ხელშეკრულებით გათვალისწინებულ საკითხებზე „მხარეები“ ერთმანეთის ინფორმირებას ახდენენ მათ მიერ განსაზღვრული, უფლებამოსილი პირების მეშვეობით, წერილობითი ფორმით, ელექტრონული ფოსტით ან/და სატელეფონო კომუნიკაციის გზით.

მუხლი 4. ინფორმაციის გამოთხოვის პროცედურა

1. „ნებულას“ მოთხოვნა უნდა შეიცავდეს მონაცემთა სუბიექტის პირად ნომერს.

2. პასუხისმგებლობა „პერსონალურ მონაცემთა დაცვის შესახებ“ საქართველოს კანონის მე-5 მუხლის „ა“ ქვეპუნქტის დაცვაზე (მონაცემთა სუბიექტის თანხმობა) კანონისა და მონაცემთა სუბიექტის წინაშე ეკისრება „ნებულას“.

3. „სააგენტო“, ხელშეკრულების პირველი მუხლის მე-2 პუნქტებით გათვალისწინებული ინფორმაციის მიწოდებას (დაბრუნებას) „ნებულასათვის“ უზრუნველყოფს მყისიერად (დროის რეალურ რეჟიმში).

4. „ნებულა“ აცნობიერებს მისთვის გადასაცემი ინფორმაციის სამართლებრივ სტატუსს, პერსონალური მონაცემების დაცვის მნიშვნელობას, მისი დაცვისათვის საქართველოს კანონმდებლობით დადგენილ მოთხოვნებს და პასუხისმგებლობა იმასთან დაკავშირებით, რომ „ნებულას“ მიერ მოთხოვნილი ინფორმაცია დაკავშირებულია მის

საქმიანობასთან და გამოყენებული იქნება მხოლოდ კანონის შესაბამისი მიზნებისათვის, აგრეთვე, მიღებული ინფორმაციის კონფიდენციალობაზე ეკისრება „ნებულას“.

5. „სააგენტო“ პასუხისმგებელია ამ ხელშეკრულებით გათვალისწინებული პირობებით, მხოლოდ ინფორმაციის გაცემის მომენტისათვის (ინფორმაციის გაცემის თარიღი) „ბაზაში“ დაფიქსირებული მონაცემების სისწორეზე.

მუხლი 5. მხარეთა უფლება-მოვალეობანი

1. „ნებულა“ ვალდებულია:

ა) არ დაუშვას „სააგენტოსაგან“ მიღებულ ინფორმაციაზე მესამე პირთა დაშვება (წვდომა), „სააგენტოსგან“ მიღებული ინფორმაციის მესამე პირებისათვის გადაცემა, გადაცემის მიზნით დამუშავება/სისტემატიზაცია ან/და სხვაგვარი ხელმისაწვდომობა, კოპირება/შენახვა, (გარდა კანონმდებლობით გათვალისწინებული შემთხვევებისა), როგორც ხელშეკრულების მოქმედების ვადის განმავლობაში, ისე მისი ვადის გასვლის შემდგომ;

ბ) უზრუნველყოს „სააგენტოს“ მიერ ადმინისტრირებადი „ბაზიდან“ ამ ხელშეკრულებით გათვალისწინებული წესით ინფორმაციის გამოთხოვა მხოლოდ კანონმდებლობით და წესდებით და/ან „ნებულას“ პარტნიორთა კრების ოქმით დადგენილი საკუთარი უფლებამოსილებების განსახორციელებლად, მკაფიოდ განსაზღვრული კანონიერი მიზნისთვის და იმ მოცულობით, რომელიც აუცილებელია ამ კანონიერი მიზნის მისაღწევად;

გ) გამოთხოვილი მონაცემების დაცვის მიზნით, მიიღოს უსაფრთხოების შესაბამისი ზომები მათი არასანქცირებული ან/და შემთხვევითი დარღვევის, დაკარგვის, არასანქცირებული შეღწევის, შეცვლის ან გავრცელების წინააღმდეგ. ასევე, არ დაუშვას მათი გამოყენება კანონიერ მიზნებთან (კანონით პირდაპირ გათვალისწინებულ მიზნებთან) შეუთავსებელი გზით;

დ) აცნობოს „სააგენტოს“ იმ საკანონმდებლო და/ან ადმინისტრაციულ/ორგანიზაციული ცვლილებების შესახებ, რომლებიც გავლენას ახდენენ ამ ხელშეკრულების პირობებზე, ცვლიან ხელშეკრულების საგანს და/ან მიზნებს, ცვლილების ამოქმედებიდან 5 (ხუთი) სამუშაო დღის ვადაში;

ე) აღრიცხოს პირველი მუხლის მე-2 პუნქტით გათვალისწინებული სერვისით სარგებლობის შესახებ ინფორმაცია, სააგენტოსგან მიღებული მონაცემთა სუბიექტის რეკვიზიტების, „საიტზე“ მათი მხრიდან გამოხატული თანხმობის (მონაცემთა სუბიექტის თანხმობა), მონაცემთა სუბიექტის მიერ საიტზე ატვირთული პირადობის მოწმობის ელექტრონული ვერსიის, სერვისით სარგებლობის თარიღის/დროის მიხედვით. ამ პუნქტის შესაბამისად აღრიცხული ინფორმაცია „ნებულაში“ უნდა ინახებოდეს არანაკლებ 1 (ერთი) წლის განმავლობაში;

ვ) მიაწოდოს „სააგენტოს“ ამ მუხლის „ე“ ქვეპუნქტის გათვალისწინებით აღრიცხული ინფორმაცია, მოთხოვნიდან 3 (სამი) სამუშაო დღის ვადაში.

2. „ნებულა“ უფლებამოსილია გამოითხოვოს პირველი მუხლის მე-2 პუნქტით განსაზღვრული ინფორმაცია, მის მიერ განხორციელებული საგანმანათლებლო პროექტში მონაწილეობის დაფინანსების შეღავათის გავრცელების მიზნით და კანონმდებლობის ფარგლებში.

3. სააგენტო ვალდებულია:

ა) ამ ხელშეკრულებით გათვალისწინებული პირობებით, სათანადო მოთხოვნის მიღებიდან მყისიერად (დროის რეალურ რეჟიმში) მიაწოდოს „ნებულას“ ინფორმაციის გაცემის მომენტისათვის (მონაცემების მოთხოვნის თარიღი) მონაცემთა ბაზებში დაფიქსირებული მონაცემები;

ბ) აცნობოს „ნებულას“ იმ საკანონმდებლო და/ან ადმინისტრაციულ/ორგანიზაციული ცვლილებების შესახებ, რომლებიც გავლენას ახდენენ ამ ხელშეკრულების პირობებზე, ცვლიან ხელშეკრულების საგანს და/ან მიზნებს, ცვლილების ამოქმედებიდან 5 (ხუთი) სამუშაო დღის ვადაში.

4. სააგენტო უფლებამოსილია:

ა) „ნებულასგან“ მიიღოს ინფორმაცია იმ საკანონმდებლო და/ან ადმინისტრაციულ/ორგანიზაციული ცვლილებების შესახებ, რომლებიც გავლენას ახდენენ ამ ხელშეკრულების პირობებზე, ცვლიან ხელშეკრულების საგანს და/ან მიზნებს, ცვლილების ამოქმედებიდან 5 (ხუთი) სამუშაო დღის ვადაში;

ბ) „ნებულასგან“ მიიღოს ამ მუხლის პირველი პუნქტის „ე“ ქვეპუნქტით გათვალისწინებული ინფორმაცია მოთხოვნიდან 3 (სამი) სამუშაო დღის ვადაში;

გ) მოსთხოვოს „ნებულას“ მე-6 მუხლის მე-2 პუნქტით გათვალისწინებული ჯარიმის გადახდა.

5. „სამინისტრო“ ვალდებულია უზრუნველყოს ხელშეკრულებით გათვალისწინებული კავშირის უზრუნველსაყოფად საჭირო ღონისძიებები, საკუთარი ინფრასტრუქტურის გამართული მუშაობა და შეუფერხებლად გამოყენება.

მუხლი 6. მხარეთა პასუხისმგებლობა და დავის გადაწყვეტის წესი

1. მხარეთა შორის სადავო საკითხები წყდება მოლაპარაკების გზით, შეთანხმების მიუღწევლობის შემთხვევაში, დავას განიხილავს სასამართლო, საქართველოს კანონმდებლობით დადგენილი წესით.

2. ამ ხელშეკრულებით განსაზღვრული პირობების დარღვევის ან/და არაჯეროვნად შესრულების შემთხვევაში, „ნებულას“ დაეკისრება ჯარიმა თითოეული ასეთი დარღვევისათვის/არაჯეროვანი შესრულებისათვის 500 (ხუთასი) ლარის ოდენობით, რომლის გადახდა განხორციელდება „სააგენტოს“ მიერ მითითებულ ანგარიშზე. აღნიშნული ჯარიმის გადახდა არ ათავისუფლებს „ნებულას“ „პერსონალურ მონაცემთა დაცვის შესახებ“ საქართველოს კანონით გათვალისწინებული პასუხისმგებლობისაგან.

3. ამ ხელშეკრულებით გათვალისწინებული საკითხები რეგულირდება საქართველოს კანონმდებლობით.

მუხლი 7. ფორსმაჟორი

1. მხარეები არ არიან პასუხისმგებელნი თავიანთი ვალდებულებების სრულ ან ნაწილობრივ შეუსრულებლობაზე, თუ ეს შეუსრულებლობა გამოწვეულია ფორსმაჟორული, მათ შორის, ისეთი გარემოებებით, როგორიცაა წყალდიდობა, ხანძარი, მიწისძვრა და სხვა სტიქიური მოვლენები, აგრეთვე საომარი მოქმედებები თუ ისინი უშუალო ზემოქმედებას ახდენენ ხელშეკრულების შესრულებაზე. ხელშეკრულების შესრულების ვადა გადაიწევს შესაბამისი დროით, ფორსმაჟორის გამომწვევ გარემოებათა დასრულებამდე.

2. მხარე, რომელსაც შეექმნა ფორსმაჟორული გარემოება 3 (სამი) სამუშაო დღის ვადაში აცნობებს ხელშეკრულების სხვა მონაწილეებს ვალდებულების შეუსრულებლობის მიზეზებს და მათი შესრულების მოსალოდნელ თარიღს, რის შემდეგაც, ნაკისრი ვალდებულებების შესრულება შეიძლება გადაიდოს ფორსმაჟორის გაგრძელების ვადით ან ხელშეკრულება შეწყდეს მხარეთა შეთანხმებით.

მუხლი 8. ხელშეკრულების მოქმედების ვადა, შეწყვეტა და მასში ცვლილებები

1. წინამდებარე ხელშეკრულება ძალაში შედის მხარეთა ხელმოწერის დღიდან და მოქმედებს 2016 წლის 31 დეკემბრის ჩათვლით.

2. წინამდებარე ხელშეკრულება შესაძლებელია შეწყდეს ურთიერთშეთანხმებით. შეწყვეტა შესაძლებელია ასევე, ხელშეკრულების ერთ-ერთი მხარის ინიციატივით, უპირობოდ, ნებისმიერ დროს, ხელშეკრულების დანარჩენ მხარეთათვის, შეწყვეტამდე 15 (თხუთმეტი) კალენდარული დღით ადრე, წერილობითი შეტყობინების გაგზავნის გზით. აღნიშნული ვადის გასვლისთანავე ხელშეკრულება ითვლება შეწყვეტილად.

3. წინამდებარე ხელშეკრულებაში ცვლილებების და დამატებების შეტანა დასაშვებია მხარეთა ერთობლივი წერილობითი შეთანხმებით;

4. ხელშეკრულების მხარეები უფლებამოსილნი არიან მოითხოვონ ხელშეკრულების მისადაგება შეცვლილი გარემოებებისადმი.

მუხლი 9. დამატებითი პირობები

1. ხელშეკრულების მხარეები ვთანხმდებით, რომ მონაცემთა ბაზების მართვის პროცესების სპეციფიურობის გათვალისწინებით, „სააგენტო“ პასუხს არ აგებს „ნებულასთვის“ მონაცემთა სუბიექტზე გაცემულ ინფორმაციაში, ამ ინფორმაციის „ნებულასთვის“ მიწოდების შემდგომ პერიოდში, განხორციელებული ნებისმიერი სახით ცვლილების გამო დამდგარ შედეგზე.

2. წინამდებარე ხელშეკრულებაზე ხელმოწერით, მხარეები ვადასტურებთ, რომ „სააგენტო“ არ არის პასუხისმგებელი და მას არ შეიძლება მოეთხოვოს პასუხი ისეთ შესაძლო ზარალზე და/ან ზიანზე, რომელიც შეიძლება მიაღგეს „ნებულას“ და/ან ნებისმიერ მესამე პირს (პირებს), რომელსაც „ნებულა“ უზრუნველყოფს, ან შეიძლება უზრუნველყოფს, ან შეიძლება უზრუნველყოფს რაიმე სახის შეღავათით, რაც შეიძლება

წარმოიშვას „ბაზაში“ არსებულ ინფორმაციაზე (მონაცემებზე) დაყრდნობით „ნებულას“ მიერ განხორციელებული ქმედების ან უმოქმედობის შედეგად.

3. წინამდებარე ხელშეკრულებაზე ხელმოწერით „ნებულა“ ადასტურებს მზაობას საკუთარი შესაძლებლობების ფარგლებში თვითონ უზრუნველყოს ნებისმიერი იმ ფიზიკური პირის (პირების) დაკმაყოფილება, რომელსაც შეიძლება მიაღგეს რაიმე სახის შესაძლო ზიანი და/ან ზარალი, „ნებულას“ მხრიდან განხორციელებული რაიმე მოქმედების ან უმოქმედობის შედეგად, რაც უკავშირდება „ნებულას“ მიერ „ბაზაზე“ დაყრდნობით რაიმე სახის (ფულადი ან არაფულადი) შეღავათით სარგებლობას.

4. ამ მუხლში აღნიშნული პირობები ძალაში დარჩება წინამდებარე ხელშეკრულების შეწყვეტის (გაუქმების, ძალადაკარგულად გამოცხადების) შემთხვევაშიც.

5. წინამდებარე ხელშეკრულება შედგენილია ქართულ ენაზე, 3 (სამი) თანაბარი იურიდიული ძალის მქონე ეგზემპლარად, თითოეულ მხარეს გადაეცემა თითო ეგზემპლარი.

6. მხარეებს შორის ნებისმიერი შეთანხმება ამ ხელშეკრულების ფარგლებში, განხორციელდება წერილობითი ფორმით და როგორც განუყოფელი ნაწილი, დაერთვება ხელშეკრულებას.

საქართველოს შრომის, ჯანმრთელობისა და სოციალური დაცვის სამინისტრო
ქ. თბილისი, აკაკი წერეთლის გამზ. N144
საიდენტიფიკაციო კოდი : 211333957



ზაზა სოფრომაძე
მინისტრის მოადგილე

სსიპ - სოციალური მომსახურების
სააგენტო

ქ. თბილისი, აკაკი წერეთლის
გამზ. N144, ს/დ 202178927



კობა სონღულაშვილი
დირექტორის მოადგილის
მოვალეობის შემსრულებელი

შპს „ნებულა“

ქ. თბილისი, დიდუბე-ჩუღურეთის
რაიონი, აკ. წერეთლის გამზ. N87ბ. ბ.70

გიორგი ჭილაია
გენერალური დირექტორი